



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tiryimyim@aolima



tir yimyim

TAPAK 3



Myanmar military tekolakba
acting president kumogo



VOL. XXI ISSUE NO. 281 (ADOK 281) DIMAPUR RASEMNÜ (WEDNESDAY) CHITENI (JULY) 24, 2024

₹ 5.00

Nirmala Sitharaman-i otsü tasen ka yanglua Union Budget tenethenbuba atongtepa sayaogo

UNION BUDGET 2024 ₹

COSTLIER

Telecom ▲
equipment
Ammonium▲
Nitrate
Plastic ▲
Products

CHEAPER

Cancer ▼
Medicines
Mobile Phone▼
Silver ▼
imported Gold▼
Leather Goods▼
Seafood ▼

New Delhi, July 23, 2024 (Agencies): Mongubarnü Union Finance Minister Nirmala Sitharaman-i minute 83 agiba Budget onük jembidang tongti teinyaktsü 9 nung rangloksü aser iba ajanga maongka aika adoktsü ta ashi.

Sitharaman-i Budget 2024-25 indang jembidang employment nungi energy security nungi next-generation reforms

telemsa kecha melii India nunger ajak tejakleni aotsü asoshi inyaktsü temulungtetba lir" ta Sitharaman-i ashi.

Taküm February ita lai Parliament interim budget benokba indang jembidang "Asenoki 'Garib' (Sensaker), 'Mahilayen' (Tettsürtem), 'Yuva' (Lanur) aser 'Annadata' (Aluyimer) asoshi temulung agütsüslü" ta ashi.

"Annadata atema onoki ita ka tejdakdang major crops ajak atema minimum support prices sangdongogo aser iba ya onoki nangzükba ama inyakogo. Pradhan Mantri Garib Kalyan Anna Yojana küm pungu atema atsülangogo aser iba ajanga nisung crore 80 ajangzüker" ta Union Finance Minister-isa ashi.

Taküm Union Budget ajanga employment, skilling, MSMEs aser middle class dak rangloker ta lisa ashi.

Prime Minister-i scheme 5 tenzüksür aser iba ya taruba küm pungu tsüngda lanur crore

4.1 nem maongka agütsüslü asoshi lir. Iba asoshi Rs 2 lakh crore lemezüksür, ta Sitharaman-i ashi.

Taküm sorkari education, employment aser skilling atema Rs 1.48 lakh crore lemezüksüogoo.

"Nübertemi ozü sorkar nem iba linük terenlok aser azükaru len anitsü asoshi maongka balaka agütsüogoo. Interim budget nung onoki 'Viksit Bharat' atongtsü atema detailed roadmap ka sayutsü nangzük aser iba den liromedema iba budget ajanga nisung ajak nem maongka agütsüslü atema tongtipang teinyaktsü 9 nung rangloker" ta Sitharaman-isa ashi.

Iba teinyaktsü 9 ya

Productivity and resilience in Agriculture; Employment & Skilling; Inclusive Human Resource Development and Social Justice; Manufacturing & Services; Urban Development;

Energy Security; Infrastructure; Innovation, Research & Development; aser Next

Generation Reforms lir.

"Item nung ajemdaker budget balala yanglutsü aser ano teinyaktsütem bendenloka aotsü" ta lisa ashi.

Tanü Union Budget nung Opposition-i temulung masübaji Sitharaman-i Bihar aser Andhra Pradesh atema metedaktsüba liasü. Iba state ana nung JD(U) aser TDP teloktem ya BJP-i aniba NDA atema kanga dang tongtipang teyaritepetem lir.

Tanü Union Finance Minister Sitharaman-i Bihar aser Andhra Pradesh atema teyari balala agütsüba osang metedaktsüdang Opposition züngsemtemi "sorkar kümzüksü indang budget" aser "sorkar kümzükang" ta ayimtena liasü.

Mongubarnü Sitharaman-i Budget tenethenbuba atongtepa sayaogo aser iba ajanga lai taoba prime minister Morarji Desai indang otsü ajatetogo.

Prime Minister Narendra Modi-i aniba sorkar kümzük aser iba ya mezüngbuba Union Budget lir.

Social Protection Help-Desk Project tenzük

Nagaland nunga FPA India Diamond Jubilee among

Kohima, July 23, 2024 (TYO): ta tenati ashi.

Parnoki Phek aser Zunheboto nung temulung agütsüslü aser tEA-i tanga tesemtem aser nübertem dangi iba project bener aotsü lenmang bushiteptsüla ta Swasti team-isa metedaktsü.

"Iba mapatong ya Nagaland nung health care tajungba aküntsü asoshi lir. tEA-i tashitait field team tentetsü aser parnok capacity training agütsü" ta Bhawana-i ashi.

Iba sentong nung tongti tesemdanger Directorate of Health and Family Welfare Principal Director Dr. E Motsuthung Patton-ia o jembidang tangar memenepba nübertem health care tsütsü tetsüdkaktsü tuluba ajuruba indang ashi.

"State sorkari PMJAY, PMJBY aser PMSBY amala health schemes agütsür saka item osang tejangja memetetba agi nisung aikati teyari mangur. TATA AIG-i iba mapa tenzükba atema kanga pelar aser iba ajanga osang prokshitsü aser nisung ajaki health schemes angutsü" ta Dr. Motsuthung-isa ashi.

Social Health Project ya Nagaland nung Zunheboto aser Phek District tem nung temulung agüja inyaktsü. Iba mapatong kübok Ayushman Bharat - Pradhan Mantri Jan Arogya Yojana, Pradhan Mantri Suraksha Bima Yojana, Pradhan Mantri Jeevan Jyoti Bima Yojna, E-shram Card aser Chief Minister Health Insurance Scheme amala Social Security Schemes adentsü.

Kohima, July 23, 2024 (TYO): Family Planning Association of India (FPAI) tenzüker küm 75 ajungba Diamond Jubilee Nagaland nunga mongogo.

Iba sentong ya Nagaland Branch Kohima-i FPAI Nagaland Branch Muskan Centre nung ayongzuka among aser Chief Medical Officer Kohima Dr. Leamnyei Konyak-i tetushi süa jaoker ka ama shilem agia liasü.

"Tetsür kati tanur aika asoba aser aiben mashisa akumba ajanga temang anema alibaren nung timtem adoker ta angateta FPAI tentet. Shisashir tetsür telok kati 1949 nung FPAI tenzük aser International Planned Parenthood Federation nung züngsem" ta Dr. Leamnyei-i ashi.

FPAI ya voluntary, non-Governmental organization ka lir aser iba ajanga India nung Family

planning movement mezüng tenzük ta pai ashi.

"Iba anogomong nung Association-i nübertem tashi itdaktsüba, tetsür-tebur tsüngda rara ajema kümaktsüba aser tetsürtem rongsenketzung jenjang tajungba kümaktsüba asoshi tenüngsang agütsür aser pelar" ta CMO Kohima-isa ashi.

FPAI national aser state branch tenzükertemi mapta tajung inyaba aruba atema tetushi agütsür aser Nagaland State Branch 1979 nung tenzükba kobii melii Golden Jubilee amongtsü ta Dr. Leamnyei-isa ashi.

"FPAI-i küm 75 tashi bendanga agütsüba, meranga inyakba aser Sexual and Reproductive Health (SRH), Family Planning, Adolescent SRH, Climate Change and Humanitarian Response wadang nung shilem tajung agia aruba

atema benjunteper" ta Branch Steering Committee (BSC), FPA India, Nagaland Branch - Kohima, chairperson Thejavizo Kire-i ashi.

"India sorkar indang mezüngbuba five-year plan (1952) nung family planning enoksembe nung FPA India-i tongti süa yaritep. Item maparen ajanga alima nung Family Planning indang policy mezüng yangluba linükji India lir" ta pai ashi.

FPA India senmang ya linük adenba orr lir aser International Planned Parenthood Federation (IPPF) founding members nung India dena lir, ta Thejavizo Kire-i ashi.

FPA India küm 75 ajungdang onoki Indian state 18 nung SRHR information aser services kasasa agütsüslü tenangzükba nung noktaker, ta paisa ashi.

DoSE-i anir Shiksha Saptah (Education Week) amonger

Kohima, July 23, 2024 (TYO): New Education Policy (NEP) tenzüker July 29 nü küm pezü ajungba tenüng nung Nagaland nung yashi nungi Shiksha Saptah (Education Week) amonger.

July 22 nü mezüng anogo nung Nagaland kübok Government, Central aser Private school aikati shilem agiogo. Parnoki Teaching Learning Materials (TLM) Mela/exhibition dena sentong balala agi ta Nagaland Education Mission Society, Samagra Shiksha-i ashi.

Mezüng anogo nung shilem agirtemji school 2315, tesayur 15874, kaketshir 258683 liasü

aser parnoki demonstrations 6720 agiogo ta Samagra Shiksha-i ashi.

Tanü Foundational Literacy and Numeracy (FLN) dak sendakba sentongtem agi aser iba ya 2026-27 tashi nung arishi küm 3-8 tsüngda kaketshir tem Universal Foundational Literacy & Numeracy atongsü atema NIPUN Bharat Mission objectives osang prokshitsü atema agi.

State Mission Director, Samagra Shiksha & State Nodal Officer for Shiksha Saptah, Temsunaro Aier-i anir Department of School Education, SCERT aser Samagra Shiksha

ketdangsürtemi GMS, New Ministers Hill Kohima nung shilem agia liasü.

Iba sentong nung adenba kaketshir nem NIPUN Bharat Mission pledge agidaktsü.

Shiksha Saptah (Education Week) ya July 27 nung ang tembangtsü aser idangji lokti lennirtem den külemi Mission LiFE agütsü. Iba anogo nungsa kaketshir tem asoshi Tithi Bhojan alitsü.

Department of School Education-i anogoshia school temi shilem agiba repranger aser iba osangji Ministry of Education google tracker nung agütsür.

Kohima nung Nagaland Hiphop Music Festival 2024 ayongzüktsü



Pezü buba Nagaland Hiphop Music Festival ayongzüktsü aliba dak sendakba nung iba benjongmung ketcangsür temi The Black Rose Café, Kohima nung Mongulbarnü osangbener den jembidang tangokba noksa ka yangi angur.

Kohima, Chiteni/July 23 shilem agitsü, kong Meghalaya (TYO): The Black Rose nungi Khasi Bloodz-i headline Enterprise ajanga August 24, 2024 nü RCEMPA, Jotsoma nung pezü buba Nagaland Hiphop Music Festival ayongzüktsü renemshitar, koba TaFMA-i yarisemtsü aser Table-3 ajanga achayangtsü.

Mongulbar nikongdang The Black Rose Café nung osangbener senden ka nung jembidang, iba sentong ya nikongdang 1:00 ako nungi Battles aser Competitions agia tenzüktsü aser iba sülen concert ya nikongdang 6:00 ako nungi alitsü, ta CEO Table-3, LC Sekhose-i ashi.

Table 3 ajanga ayongzükba sentong ya Nagaland nung 2019 nungi hip-hop scene balala sayatsü asoshi sapang tajung ka ama arur, ta Sekhose-i ashi.

COVID-19 pandemic mechi khen anena ataba sülen iba benjongmung ya temulungtetba tulu nung taküm nungi tenzüker, ta pai ashi.

Iba benjongmung nung takotet kentener 13 ajanga

nungi Khasi Bloodz-i headline asütsü aser Tenacious, Savizo, Ning Dang Ri, ZT Slingshot, J. Polland, Renbeni, Coffee (NBC), The Knot (SJC), DJ LIL' BomB, Nentong Konyak, Psycho K4, aser Meyisanen Lemtur nungeria shilem agitsü.

Ken ajanga sobaliba aser kin balala benjongtsü nükjidong taküm iba benjong ya ayongzüker.

Iba sentong nung terepranger nisung 1000 dak tema adentsü imlar aser ticket shia senpak 300 alitsü aser ticket ya Black Rose Cafe, D Cafe, Garden of Eaten, Kindred, Cafe Eva, aser RCEMPA nung angutsü, ta iba sentong ayongzükba temi ashi.

Chiyongtsü, beverages, coffee aser merchandise ayoktsü atema stall kar alitsü, ta pai metedaktsü.

Iba sentong indang osang tejangja metetner temi Instagram table_317417 nung tongteprateptsü akok.

Ken atenba den külemi iba

benjongmung nung Nagaland Beatbox Community den lungjemer Nagaland Beatbox Championship alitsü aser Lamgrace Studio den lungjemer dance competition alitsü.

Tetoktepba anaprong atema online auditions tenzükogo aser dance audition ya August 8 nü tembangtsü aser beatbox audition ya August 17 nü tembangtsü.

Iba competition shia entry fee ya sen 500 alitsü aser dance competition nung takok angur nem senpet sen 20,000 aser beatbox nung takok angur nem senpet sen 25,000 agütsütsü.

Iba benjongmung nung Arunachal Pradesh, Assam, Manipur, Mizoram, Delhi, Kolkata, Bangalore, aser Chennai densema states balala nungi arua shilem agitsü imlar, ta ashi.

Osangbener senden nung Naga rapper Moko Koza, Lamgrace Studio kibur aser Nagaland Beatbox Association tir dena liasü.

Public Accounts Committee indang Oral Evidence Meeting ayongzüktsü

Dimapur, Chiteni/July 23

(TYO): MLA aser Committee on Public Accounts indang chairman, Mhathung Yanthan-i Public Accounts Committee, Nagaland Legislative Assembly indang Oral Evidence Meeting ka July 30, 2024 nü anüngdang 11:00 ako nungi jazüka lir.

Iba senden nung Prisons, Land Records & Survey, Higher Education, Youth Resources & Sports, Health & Family Welfare, Urban Development, Evaluation, Economics & Statistics, Legal Metrology & Consumer Protection, Forest, Environment & Wildlife, PWD (R & B), PHE, CAWD, PWD (Housing), SCERT, Home Guards, Police Department (Police Engineering Project), Technical Education, Planning &

Transformation, Power, Co-operation, Industries, Sericulture, Labour, School Education, Municipal Affairs, Tourism aser Rural Development department tem nungi ketcangsürtem adentsü, ta sangdong ka ajanga ashi.

Committee ajanga Comptroller and Auditor General of India-i 2020-2021 atema State Finances Audit Report agütsüba Audit para(s) indang oral evidence agütsü, ta metedaktsü.

Anungji shia aliba department tem nungi AHODs aser HODs tem ajak medema arua dena Committee matsüngdang kuli agütsütsü metedaktsü.

Iba den Committee züngsem ajak iba senden nung adentsü ayongzüker, ta sangdong ajangasa ashi.

TB Forum Pfutsero block senden amen



Dimapur, Chiteni/July 23

(TYO): TB Forum Pfutsero block senden ka Conference Hall, CHC, Pfutsero nung July 23, 2024 nü mena liasü.

Iba senden nung Dr. Mike Whourie, CMO Pfutsero ajanga iba forum indang nükjidong balala rateta ashi aser National Tuberculosis Immunization Programme ya India nung 2025 küm tashinung TB tashidak samatsütsü aser nüburtem aser shirangertem tsüngta apu yangluja sorkari mozü angati agütsütsü asoshi lir, ta ashi.

Iba senden nung Noklen, Vaccinator CHC, Pfutsero menden liasü aser Phuniang, SDO (C) Pfutsero ajanga sentong tenzüka jembi aser Pastor Kedewepe Mero, Calvary Baptist Church ajanga Tsüngrem temoatsü meshia sarasadem.

TB tashidak nungi takum jenbur aser TB tashidak madak takok angur Kuvetso aser Khruzonyi nungeria takum kuli lemsatep aser Tusove BPM CHC, Pfutsero ajanga melezung o jembia liasü.

AR-iZunhebotonung career counselling ayongzüktsü



Dimapur, Chiteni/July 23

(TYO): Assam Rifles temi Air Force Recruitment Office, Guwahati den lungjemer Armed Forces nung career counselling aser awareness campaign ka ayongzüka liasü.

Iba sentong ya Zunheboto District kubok Woodland Higher Secondary School aser Immanuel Higher Secondary School nung azüngertem asoshi July 22, 2024 nü ayongzüka liasü.

Kaketshirtem Indian Air Force nung adentsü jangra alir dang lenmang sayutsü nükjidong nung iba sentong ya ayongzük, kong recruitment processes, eligibility criteria, training programs, aser career progression amala onük nung ajemdaker rasaa ashi, kong tatidang, fitness test, medical assessments aser interview amala alir ta ashi.

Kasa sentong nung quiz session ka ayongzüka shilem agirtem nem sempet agüja liasü.

Iba sentong nung Woodland Higher Secondary School nungi kaketshir 110 aser Immanuel Higher Secondary School nungi kaketshir 95 den principals aser tesyur tem dena liasü.

Linük defense force nung tarutsü nükla lanur tem nem teyari balala agütsütsü nükjidong nung iba sentong ya ayongzüka liasü.



Nagaland Angh La Ganesan-i July 23, 2024 nü Naga Bhavan Conference Hall, Raj Bhavan Kohima nung Coffee Board Regional Office ketcangsür, Joint Director Navin Kumar Bahl Ryntathiang, Deputy Director Jayanta Ghosh, aser Director, Land Resources, Government of Nagaland, Albert Ngullie nungertem den senden ka amendang tangokba noksa nung angur.

NAGALAND POLLUTION CONTROL BOARD							
Sl. no	City	Location of air station	Type of area	Monitoring dates			Permissible limit As per the National Ambient Air Quality Standards "Iba tasazuk alemabo metudaktsütsüla"
				16.07.2024	18.07.2024	20.07.2024	
1	Dimapur	Bank Colony	Residential	34	43	37	100 µg/m³
2		Dhobinala	Commercial	82	92	74	
3		NPCB Office, Signal Colony	Residential	53	47	33	
4		Tenyiphe, Chumoukedima	Commercial	35	33	23	
5		Nagarjan	Residential	28	23	27	
6		Viola colony	Residential	20	20	27	
7		Burma camp	Commercial	67	63	76	
8	Kohima	Opposite NST Office	Residential	26	23	21	
9		PWD Junction	Commercial	46	40	31	
10		High School Junction	Commercial	75	78	67	
11		Midland (Upper)	Residential	28	28	29	
12		Forest Colony	Residential	33	24	26	

Iba osang ya nübortem ajangzüktsü atema Nagaland Pollution Control Board-i agütsür.

PM Modi Union Budget-2024 pelashishia agizük



Monsoon session nung Union Budget benokba anogo Aam Aadmi Party MP temi Parliament House complex nung longkak aitba noksa nung angur.

New Delhi, Chiteni/July 23

(Agencies): Union Budget-2024 benokba sülen iba dak sendakba nung mezüngbuba o jembiba mapang Ato Kilonser Narendra Modi-i, Parliament nung Union Finance Minister Nirmala Sitharaman-i kanga junga jembiba atema la nem tenüngsang agütsü aser ashiba agi, iba ajanga lokti nung telok ajak tashi itshidaktsüogo.

"Nükla tajung yur yangluba iba budget yagi lokti nung ajak tashi itshidaktsüogo iba ajanga tarutsü tajungba ka asoshi lenmang lapoktsütsü," ta Modi-i Finance Minister Nirmala Sitharaman-i benokba Union Budget indang jembiba

mapang ashi.

Modi-i ashiba agi, iba budget ya middle class tashi taitba kümdaktsütsü nükjidong nung yangluogo aser iba ajanga education aser skills development jenjang ajungketsütsü.

"Tribal lokti, Dalit tem aser backward class tem nem tashi tali agütsütsü atema budget nung sentong tajung benokogo. Iba budget ajanga tetsürtem rongsenketzung terenlok nung shilem agitsü atema teyari agütsütsü," ta Ato Kilonser-i ashi.

Ato Kilonseri ashiba agi, iba budget ajanga tila teri shihilembartem aser MSMES tem atema lenmang tasen lapoktsütsü.

"Budget ya manufacturing aser infrastructure dak rangloker jenjang agiogo. Iba ajanga rongsenketzung terenlok asoshi teyari agütsütsü," ta Modi-i ashi.

Ato Kilonserisa taoba küm 10 tsüngda nisung crore 25 sensaktia nung aliba nungi anitetogo, ta ashi.

"Iba dak ajemdaker budget ajanga neo-middle class tem tejangraba tali tashi taitba kümdaktsütsü. Lanurtem atema maongka aika agütsütsü," ta pai ashi.

"Iba budget ajanga taoba mapang dang nungi balaka middle class ajungketsütsü," ta Ato Kilonser-i ashi.

aazükba anasü agi timba kümdaktsütsü ta nangzükaka lai o jembiba mapang state khen danga meshisem, ta ashi.

Samajwadi party tekolakbaisa, Uttar Pradesh nung aluyimertem tang tashi shihilembadak mali aser Bihar nung Buxar nungi tenzüka highway ka yanglutsü sangdongba ya Uttar Pradesh kubok Purvanchal Expressway tashi atsülangtsütsü asü, ta ashi.

Andhra Pradesh nung ruling TDP aser Bihar chief minister Nitish Kumar-i aniba JD(U) na Bharatiya Janata Party-i aniba NDA sorkar nung shilem ka lir. Parnoki state nem senotsü teyari agütsütsü atema nongshia aruogo, koba budget ajanga aluyimertem dang parnok

sayuogo.

Ajisüaka Akhilesh Yadav-i iba ya parnok alliance meraksai ayutsü aser sorkar kümzüktsü atema yimden yimsüsüba dak ajemdaker jenjang agiba lir, ta ashi.

Paisa, sorkari kechiba India nung nütsüngyongsük timtiba aliba state Uttar Pradesh terelok asoshi kecha scheme mebenok ta asüngdang.

Yadav-isa, budget nung mapo timba agütsütsü aser skilling initiatives atema jenjang agiba aitsüogo. Samajwadi Party MP-i ashiba agi, lanurtem atema internships amala mapang tatsüka atema inyakyimtem ajanga unemployment tebilemtsü mebentettsü.

Kechiba Andhra, Bihar nem dang special packages agütsü?: Akhilesh Yadav

New Delhi, Chiteni/July 23

(Agencies): Samajwadi Party lenir Akhilesh Yadav-i, finance minister Nirmala Sitharaman-i Mongolbarnü benokba Union Budget 2024 aitsüogo. Uttar Pradesh nung terenlok maparen sentoka toktsüba aser lanur aser aluyimertem tejangraba anema jenjang agiba atema pai sorkar aitsüogo.

Sitharaman-i budget nung Bihar aser Andhra Pradesh na atema special package sagdongba dak sendakba nung Akhilesh Yadav-i, Narendra Modi Ato Kilonser menden tonga atuba nung Uttar Pradesh-a sendaka lir, saka taoba mapang state nung aliba aluyimertem dang parnok

ajisüaka Akhilesh Yadav-i iba ya parnok alliance meraksai ayutsü aser sorkar kümzüktsü atema yimden yimsüsüba dak ajemdaker jenjang agiba lir, ta ashi.

Paisa, sorkari kechiba India nung nütsüngyongsük timtiba aliba state Uttar Pradesh terelok asoshi kecha scheme mebenok ta asüngdang.

Yadav-isa, budget nung mapo timba agütsütsü aser skilling initiatives atema jenjang agiba aitsüogo. Samajwadi Party MP-i ashiba agi, lanurtem atema internships amala mapang tatsüka atema inyakyimtem ajanga unemployment tebilemtsü mebentettsü.

Karnataka anentsüh lendong nung asür 8 jungogo

New Delhi, Chiteni/July 23 nung nongoktsür alitsü ta (Agencies): Mongolbarnü

arishi küm 65 tain tebur ka tasümg Karnata nung Uttara Kannada district kubok Gangavalli ayong nung ngutetba sülen Karnataka anentsüh lendong nung asür nisung 8 jungogo. State nung July 16 nü nungi tenzüka tzünglu aruba ajanga tesem aika nung anentsüh aluba sülen iba lendong ataloka liasü.

National Disaster Response Force, State Disaster Response Force, Fire & Emergency Services aser Navy-i Gabgavalli ayong nung maneni tekümzükba maparen inyakdar, ta PTI sangdong ka ajanga metedaktsü.

Samar alirtem bushitetsü atema tekümzükba maparen maneni inyakdar. "Kerala nungi lorry driver (Arjun) densema nisung asem samara aliba bushitetsü atema tekümzükba maparen maneni inyakdar," ta Superintendent of Police (Karwar), Narayana M-i PTI dang ashi.

Anentsüh aluba anogo Indian Space Research Organisation-i tangokba satellite noksa ajanga anentsüh agi truck ka ayong

Iba tesem nung hopta ana tashi tzünglu kanga sashia arudar aser tesem aika nung

anentsüh aluba ajanga National Highway 66 dak kongshiogo.

Indian Meteorological Department-i, Uttara Kannada kubok tesem timba ka nung July 20 nungi 24 tashi tzünglu arutsü ta takzüksü.

Anentsüh aluba sülen Indian Army-i July 21 nü Humanitarian Assistance ana aser Maratha Light Infantry Regimental Centre (MLIRC) nungi Disaster Relief (HADR) team tem tekümzükba maparen balala atema yoka liasü. team nung officer ka, Junior Commissioned Officers ana aser tanga rank nung aliba officer 55 densema lir.

Karnataka chief minister Siddaramaiah-i Deobarnü ashiba agi, Army aser Navy naprongla dang ayong kanga junga meita aotsü mepeshia metedaktsü.

July 12 nungi 18 tashi Uttara Kannada district nung tzünglu 498 mm aru koba yimya agi 237 mm dang arur, ta IMD-i ashi.



Srinagar nung J&K nem state jenjang meyipa agütsütsü khanga longkak aitba mapang Congress pusemertem sota ayuba noksa nung angur.



NAGABAZAR BRANCH
Razhu Point, Kohima, Nagaland-797001
Email: vjohi@bankofbaroda.com

SYMBOLIC POSSESSION NOTICE

Bank of Baroda indang temelaba agütsür aliba ketdangsür ka ama, Securitisation and Reconstruction of Financial Assets and Enforcement of Security Interest (Second) Act, 2002 kubok aser Security Interest (Enforcement) Rules, 2002 Section 13(12), Rule 3 nung tashi agüja aliba dak ajemdaker **12.02.2024** nü takhangba osang ka agütsü, kong sen apur **MR. VIBEZOLIE** dang osang agütsüba sülen anogo 60 tsüngda **sen 8,19,102.50 (Rupees Eight Lac Nineteen Thousand One Hundred Two Paise Fifty only)** aotsü atema metedaktsü.

Sen apuri sentsü aotsü asoshi tamakok anguba ajanga iba osang ya sen apur aser nübertem nem, Act kubok Section 13 Sub section (4) aser Security Interest (Enforcement) Rules, 2002 Rule 8 nung tashi agüja aliba amshia kiojen aser ali agibaa **2024 küm July 22** nü metedaktsü.

Nübertem aser mejeta sen apur dang teküboklen shisema aliba kiojen aser ali dak sendakba nung kecha inyaksangshiba masütsü aser iba dak sendakba nung inyaksangshiba Bank of Baroda-i temelok densema **sen 8,19,102.50 (Rupees Eight Lac Nineteen Thousand One Hundred Two Paise Fifty only)** meshtüsü.

Section 13 kubok sub-section (8) dak ajemdaker sen apur dang atakzükja aliba mapang tsüngda kiojen aser ali meyipa agütsü metedaktsü.

Ali aser kioje terasa:

Thenakhou, Zadima Village kubok Mr. Ketoulhoulie, S/o Khrielhoulie tenüng nung aliba ali 8000 Sqft aser kiojen ajak

Artsu:- North nung: Kuotsu Clan, South nung: Soliezuo Clan, **East nung:** State Highway, **West nung:** Kuotsu Clan.

Date: 22.07.2024

Place: Kohima

Mr. Munnuren Junul Kandulna

Authorised Officer, Bank of Baroda



Nipah virus prokshia aoba mapang ka nung Coimbatore district nung Tamil Nadu Health worker temi kerala nungi aruba bus ka nung mena alirtem temperature tendangba noksa nung angur. Kerala kubok Malappurama district nung arishi küm 14 tain tebur chanu ka Nipah virus agi süogo.



TIR YIMYIM

YIMOBILEM (EDITORIAL)

DIMAPUR RASEMNÜ, JULY (CHITENI) 24, 2024

US tir asütsüba tetsür

Democratic telok nungi adoksang, US tir arishi küm 82 tain tambu Joe Biden tan November election nung inüseta pa tambur akumba agi parnok teloki meidaktsütsü asoshi nokdangba o mepaidoktet, pai pasasa joko tir menden asoshi metokteptsü telemetetba agiba den külemi pai pa tadong tir Kamala Harris nem temoatsü agütsüba ajanga US nung tetsüri ano khen tir menden asoshi merangdangtsü maongka nguogo. Atangji, Joe Biden-i shimaka par telok nungi US tir menden atema tokteptsüba nisungbo taruba ita August nung parnok lokti senden nung dang shimtsü, anungji par teloki laji shimtsü asü meshimtsüar, ajibo parnok Democratic telok mulung asütsü. Tang tashi nung Americatsürtem rongnung tir menden asoshi sashia tokteplaji Hillary Clinton liasü. Lai 2016 küm Republican telok nungi Donald Trump den toktep aser tera agidang madok. Lajia Democratic telok nungisa taoba tir Bill Clinton kinungtsü liasü. Aji oda, Democratic telok nungi adoker leniritem dak tashimait aika liaka, tajung kaji tetsürtem nem tir akümtsü maongka agütsüba ya asütsü. Atangji, alima nung tashitemetetti ba kin United States of America, kong tetsür tebur tebendang mali akümtsübutepa yimsü asür, iba ama lima ka nung tang tashi tetsür katia yimten nung tematiba tir menden mengutetbaji tesüngmangtsüka lir. America lima ama masü saka tebur yimli kubok tetsürtem süku meyir aliba Muslim aser Hindu lima Pakistan aser Bangladesh lima ama nunga tetsüri tematiba yimsütsüba menden nung menteter aser India nunga teburtem dang nungibö Indira Gandhi-iang tesashiba yimsü asüba indang otsü jembidang, US nung tetsür katia tang tashi tir mekümtetbaji tangatettsü tasak. Atangji, 1776 küm America lima yateta yimten kümvetaka, parnoka tetsürtem nembo yimten nung vote agüja yimsürtem shimba nung shilem agitsü atema temetenbo 1919 küm-ang parnok tatar senden nung latet aser 1920 küm nungiang shitakba mapa kuma benshia otet. Aji oda, US lima kumer küm 140 tashi yimten nung shilem magidaktsü ajemrepa yutsüba agi, ashiko, tang tashi America tsürtem asoshi tenokdangba meliaka teburtem koka yimten nung metoktepteter asütsüa akok. Ajisüaka, Pakistan, Bangladesh aser India lima amajibo Americatsürtem yimten nung shilem agitsü temeten ngur küm aika lir külenang British yimli talenba kubok nungi salaa nüchi akümerem lir. Joko, US nung tir election November 5 nü agitsü atema anogo noklang ka shi dang anünga lir aser Democratic telok-bo ano candidate meshim, ajisüaka Joe Biden-i mulungba nung par telok nungi teimbakati Kamala Harris shimtsü imlar. Aji oda atalok nungbo, la agi US tsür tanabubai tir menden asoshi tokteper asütsü. Kamala Harris ya tang tadong tir asünungji la US tir asütsüba teteemsü saka Donald Trump ama ka den tokteptsüba teteemsü saka temela masü. La tebu yabo Jamaica nunger aser tetsübo Indiatsür, anungji US nung alir tanak nisung aser Asia nungertem aikati la nebo aginütsüa akok. Ano külen Republican telok asoshi Joe Biden den tokteptsü asoshibo melamelar liasü saka tang Democratic telok pur nisung melentsüsa akumba agi, Republican purtema o aser election campaign sentong melentsüsa akümtsü. Democratic purtemi shiba shimdri shiham, US tir election ya alima ajak asoshi tongtibang sentong ka lir. Iba yagiang US lima yimten aser loktilibaren dang masü saka Russia-Ukraine aser Israel-Hamas tongpang ama nung dena kongshitsü. Joko, election magidangyongi Donald Trump-ibo Hamas aser Russia nungertem dang tekümdangtsü osang metedaktsüogo. Iba ama nisung ka den tokteptsü atema Kamala Harris daka US nunger tanak temesüng aser talisa lanurtem hau ta agizükettüsü tasü tait, temulung tulu aser America ajungtsü atema bilemba shisatsü aser onük bena alitsüla. Atangji, US nunger asoshi tetsür tebur kecha mali, saka Republican aser Democratic teloki kechi ashir ta asüba dak tuluka keta lir.

OLEMSABANG

TSÜNGREMI ALIMA TENZÜK NUNGI PA SÜLEN MOJING ANIDAKER

~ Süpongungsang Longkümer, Darogapathar Dimapur

Kü tangatetba oucet ka zülutsü asoshi Tsüngrem tang nai mulungra shisatsü agüjang, memulungra songtemjang ta sarasatema tenzüker. Tsüngremi Adam aser Eva tang iba atsu tiyong nung koba süngtong lir iba nungi atangba süngjang techi ta ozüng agütsü; Tsüngrem tsüngdang koba tamajung aji mojing atema tajungtiba, Mojing takinüba Tsüngrem asoshi tesembatsü tena kodanga majuruteptsü. Mojing koba tajung ta ashi aji Adami pelashishia achi saka Tsüngremi aochi nung Adam pushi saka atsüka adok anungji Tsüngrem Eden atsüki nungi aridok. kechaser Adami tadol memeshie hae ta atsükiji doktsür oa adokba Lai nung angur. Iba atsu tema nungji alitang Kaini tenu Abel tepset anungji Tsüngrem Kain aridok; kodang nai alu nung züsentir, iba lagi nü nem tejang kecha magütsütsü; na alima nung talidak maka tenemzür ka asütsü. Kaini tadol meshitsü melena Kibuba dang ashi, "kü temerenshi ni aremzütettsüba dang nungi tali tanü nai ni (alijak nungi aridoker) aser shibaisa ni ngutir pai ni tepsettsü." Kibubai langzü masü shibaisa Kain tepsettir, tenetpen agi tali pa dak mang ayangtsü." Aser kari pa ngua tepsetta lirta pa dak temaitsü ajentsü. (Tsüngremi meimchir dang otang meimba) Kaini kibuba tsüngdang nungi pila ao aser Eden anü doklen Nod lima nung ali.. Molumi nunga Tsüngrem kibursa Lipok 4:3-16. Adam nungi jakzüka aru dang Noa mapang meimchir menen ajanga tzü agi ajak samatsür Noaür semchir dak nungi Adam kidongji mesamae ano tenzükshia tanü asenok tashi Tsüngrem taochi ulura alinung meimchir temenen tesüngmangtsüka liaka joko ajak mesamatsü-e Kristai kangki nungi meimchir ajak alangzük.

Ungma yimtsüng nung 1914 nungang arogo tenzükaka Tsüngremipo 1881 nung Ungma semtanger liasü. Dr Clark ji 1881 nung kisü jensü mapang Jongshinoktang Jamir Samen pushia arua tena sensaksem ajak tema arudang Dr bai na-a amangtsü mamangtsü ta yimsüsür dangji asüngtang nung Jongshibai na-a tangang arur aji tang masü nai sayua jajaba ya kanga tajung saka ni amang nung nüpurtem ya khen makmakshitsü. anungji ni tangpo mamangli saka kiske lapoka yutsüti, missionary bai ano asüngtang, süra tamangertemji yim mesüra mepu razüka aotsü melatsü memelatsü, (Tamangertemji atsüngzüka oalir ta) Tamboi langzü, nai sayuba yimsüyimpong ya kanga tajung iba yagi Ao lima yakta asüngtsü saka Yim palaka razüka ao nung, taortemji kü chir, adianu, kinünger onok ajak kimong lumomg aser dalen ka tang asünung onok tsüngta nok maitsü aji tang masü Aor yimtsüng shinga meroksatsü ta langzüba agi Dr baji kanga süngmanga pela akizüka ta angazüka arur. Pai bilem alushe ajak yimden kapu nung lir ta bilema asüngtang südi. Iba mapang Molungyimsen razüka oadoker jajarba liasü. Nisung ana oukadaki ao nung ka medentsü ka aitsütsü Tamanger o mamanger tsüngta mamanger aitsü nung tamangeripo tai temeden metettakaji aji agi pelati ya sur yamai teinyak ta tadol agütsür salemtipber senshitsü. Tamanger o tamanger tsüngta shiba medentir taibo tena tsüngtabo tai adoktsü akok saka ou salangipo senchebo alitsü südi mesüra menokmejaosa südaktsütsü südi. ABAM tenzükle nungi tanü tashi ochi mapa mali saka arogotemi aremzükerba tang. Molungyimsen aser ABAM tsüngta ka ai mesüra müden nung koda asütsü? Tai adoker ta asüyonga azü meremposa lir. Ni ashitsüpo Molungyimsen razüka ainü tashi Molungkimong arogoji nokdaka liasü ta otsü angatetter aser Molungkimong arogoji raksar küm aika lir külen arogo yanglushibaji masü mezüng tzüseña arogo tenzükba teteemsü kimong ta otsüji jembir. Kohimaji Nagaland capital ta ajaba ama Molungkimong ajanga ABAM aser NBCC ajak atema Dec 22 1872 ji Tsüngrem Bethlehem kümaktsüba asoshi Naga nungeri Tsüngrem tenüng as anger. Molungyimsen arogo ajanga Aor tang masü Naga lima ajak Krista yimsü aser kaket shisatsü agi tenük lapoktsüba jembia aruba outsü aser kati Tsüngrem anioka kimong mesemtetepe asoshi Tsüngrem tenüng as anger. Anungji arogo sasep nungpo 1876 nungang yim mesemtetepe pelaseta temoatsü meshia amet nung tang pangtsüngkotsüngji tatem asütsü ta angatteter. Noa semchir temen kanga renloka aotang parnok tenüng akatsü Babel longki yanglutang mazuoktetba ajanga Tsüngremi ou benjatsütsüsa aküm aser mapa tamakok tang masü parnok oushi palala kuma mangatettepe tesem palalai prokhiba tanü asenoki azünger Lipok 11. Shibai Yirusalem mak sütsütir pa mak sütsütsü, aser shibai Yirusalem raksatsütsü merangtir pa raksatsütsü. Yirusalemji (IMPUR) temeshi yimtisa asütsü. Kecha limaia kü lima krista asoshi ta ayimokja mali. Anungji asenok dang Tsüngremi junger ta asüba tazünger iangateta agitsü mepishir

Iba Olemsabang nung lemsaba ken-o aser shisatsü ya iba ocet züldüri
bilemba ken-o ama tazünger iangateta agitsü mepishir

Patkai nung Golden Jubilee Choral Competition ayongzüksü



Dimapur, Chiteni/July 22 (TYO): College küm 50 ajunga (1974-2024) bilemteta Patkai Christian College (Autonomous) ajanga Arogo choir tem atema Choral Competition ka college indang auditorium nung September 21, 2024 nü ayongzüksü.

Iba competition nung arogo ajak nungi shilem agitetsü aser registration malitsü.

PCC tenzüker Nagaland Baptist Church Council aser

ka asünung college-i küm 50 benjomingung asoshi iba sentong ta tapet ta züngshir, talisa linük tesem balala aser arogo tem nung ken ajanga kanga junga kongshiba tepela temaitsü lir.

Iba Choral Competition ya TaFMA den lungjemer ayongzüksü aser iba tetoktepba nung mezüng jenjang nguteter nem senpet sen 1,25,000, tanabuba jenjang nguteter nem sen 1,00000 aser tasembuba jenjang nguteter nem sen 75,000 agütsütsü. Iba den ano Best conductor nem senpet sen 20,000 agütsütsü.

Iba competition atema registration ya August 15, 2024 tashi alitsü aser registration aser danga maparen atema choir temi +91 8729995587, +91 8837272815 ajanga tongteprateptsü akok.

Jubilee küm ka asünung Patkai Christian College ajanga küm tepiyong sentong balala ayongzüka arur aser November 2, 2024 nü benjong tenti munga tembangtsü.

ANOGO ABEN TSÜNGREM DEN

Ojang Tila Asem Asoshi Tenüngsang

"Aser Khrista Yisu nung aliba tamang aser temeim agi asen Kibuba taochi kanga tali züin" 1 Tim. 1:14

Item ojang asem - taochi, tamang aser temeim ya Pauli pa temulung meyiba nungi rasaa ashir. Taochi meimchir dak malang saka Tsüngremi odang meimba. "kechiyong nisung ajak dangi tekümtet bener aruba Tsüngrem taochi (Tita 2:11) nung Pauli zülu." Khrista shi akümba aser kangki nung angenlokba ajanga taochi sempet ama amshir anungji shirnoki mulunger parnok dangi iba taochi jungai adoktsü akok.

Kodang asenoki taochi angatetdir Kibuba Yisu dak amangba tamang sayur aser Tsüngrem metetba taküm jenjang dangi arur. Pauli aser shirnoki pei tamang Khrista nung ayur, parnok iba yagi melenshidaktsür. Asen tamangi Tsüngrem chir tabensa asen taküm nung lidaktsür.

Tsüngremi Yisu Khrista nung Pa temeim jungkai adoktsü. Khrista nung Tsüngrem den kija tesendaktep maka temeimji angatettsü makok. "Tsüngrem temeim lir" (1 Yn. 4:8). Kodang Tsüngrem taochi angatetdir Tsüngrem temeim parnok dak talubusa adoktsü. Taochi süngden lapoktsü atema tamang akatsüla. Maneni tanga süngden lapoktsü atema pa temeim angatettsüla. Ajakji Khrista nungi angur.

India nung jabaso asüba ajanga pastor aser kinunger temulung raksar lir



Bihar state nung Arwal District kübok Satpura yimtsüng nung Nilesh Kumar tasümgang July 8, 2024 nü aremdang tangokba noksa ka yangi angur.

New Delhi, Chiteni/July 23 (Agencies): Pastor Sushil Kumar aser pa kinungtsü tena teti ama sarasademsü atema July 8 anepdang 3:00 ako nung yipten nungi sak. Tena minute 90 shi lir kidangi meypa shilang nung par arishi küm 22 tain jabaso temang ya anasa shiruru metsüba ki ka tsüngbang nungi sangzü aliba angu.

Nilesh Kumar ya Bihar state nung Arwal District kübok Satpura yimtsüng nung reshikangshia amshir lenset, ta Pastor Kumar-i ashi. Medical examination agiba nung pa tepseter temi mezüng pa teka raksatsü aser lenset, ta bushitet. Parnoki pa tekong nung sü ka alenoktsü aser pa sasa soleta asüba ama tsüngbang nung sendaka yutsü, ta pastor-i ashi.

"Parnok temang kanga mejungi akum, anungji onoki ambulance jaoka parnok ya district hospital bushia yok aser doctor kati tena mozü kidang amungtsü ashi," ta Pastor Pintoo Kumar-i ashi.

Pa den danga Kristianpuri July 8 aonung tepila sentong agia tasümgang ya arem. Mang yima aliba tsürabotem ya mozuki nungi July 10 nü yoka liasü.

Iba nisung tepsetba atema

temulung melemeti Manohar Sharma den nisung kar pua bushisüngdangba mapang lir. Küm ana tejakdang higher-caste Hindu nungeri par ki ajanga senzüba atema tasü ita lower-caste Kristian kati tai apuba atema Sharma aser Nilesh Kumar nunger raretape liasü, ta pastor-i ashi.

Par jabaso tasümgang anguba sülen Pastor Kumar aser pa kinungtsü Ravita Devi na mang yima ajep aser nikongdang tashinung súchia ao, ta külém tenzüker pastor kati ashi.

"Parnok temang kanga mejungi akum, anungji onoki ambulance jaoka parnok ya district hospital bushia yok aser doctor kati tena mozü kidang amungtsü ashi," ta Pastor Pintoo Kumar-i ashi.

Pa den danga Kristianpuri July 8 aonung tepila sentong agia tasümgang ya arem. Mang yima aliba tsürabotem ya mozuki nungi July 10 nü yoka liasü.

Nilesh Kumar kisüng

mejanga lia teka sangshi aser tepset, ta tebui ashi. Par kidang mobile phone signal maliba yong Nilesh Kumar ya veranda nung signal alidak mejanga liasü.

Parnok ya July 7 aonung 8:00 ako meta chiyongba mapang tatemsa ajurutepa liasü aser Nilesh Kumar ya ayatirm meta asü südi ta amanger.

Police temi tamangba yimsü indang kecha medeni Sharma aser dangartem anema nisung tepsetba First Information Report ka benok, saka Pastor Kumar-ibo Nilesh Kumar tamangba yimsü indanga dena lir ta ashi. Küm 22 tejakdang iba yimtsüng nung Hindu yimsü nungi temulung meyipba kibong mezüngbubaji par ya liasü.

Küm ana tejakdang tetsü ki maketa nashi sü agi ali lepir aliba alema Sharma aoba mechii Nilesh Kumar-i tai apu.

Kumar ya lower caste ka aser Khrista agizükba mechii pa den akumtsübo mesüi jembiba atema Sharma-i merenshia

liasü, ta Pastor Kumar-i ashi.

Iba sülen Sharma aser par tembar Hindu nunger temi Kumar'er kibong amokmerena liasü aser parnoki par jabaso tepsettsü ta teti amokmerener ta Pastor Kumar-i ashishia Sadar police temi Sharma ya apu aser tepuokdak ayu.

Sharma ya ita ka lir bail nung chiok aser iba ken o ya tang tashi pending nung lir, ta pastor-i ashi. Iba sülen nungibö maongka angu shia Sharma-i Nilesh Kumar amokmerena aru, ta ashi.

"Nilesh-i amokmerenba ya yimya ka ama agizükba liasü. Pa Kristian lanur tajung ka liasü. Pa youth camp ka nungi tang ang arur kanga pela liasü. Küm ana jakdang kensü-osü tila kar mechii Manohar-i tayang kepzüka özü jabaso tepsettsü kodanga meibilem."

Ozü kibong ya Hindu nunger asü asüba küm ana jakdang tena asatepba mapang yimda klir ajunga adenshia Sharma dang

tali maotsü shila, ta Pastor Kumar-i ashi.

"Onok kumzüksü shinga maru, Hindu nunger asoshi onok takum apayua mali," ta pai nüktü yima ashi.

Kristian ka asüba mechii lanuwa nung par jabaso dak tenük yoker kanga mezüngmeshia aru.

"Yimdak aliba tanur temi pa dang, 'Hey hallelujah' ta sa aja. Yimdaklir temi onok bhukumer shinga mali ta meteta liasü," ta Pastor Kumar-i ashi.

Pastor Kumar ya alu lir aser kiset shiruru metsür. Par yimtsüng nung ano Kristian kibong pongu lir aser parnok küleme par tekülem kidang adener. Nilesh Kumar ya tenu tetsür ana lir, ka arishi küm 12 aser ka 17.

"Ajisüaka Nilesh medeni onok takum kodanga kasa masütsü. Pa kanga kera ogo, aser onoki pa dang tatem salem meshitet," ta Kumar-i shia sarasademsütsü mepishia liasü.

Kristianpur yariba lokti Open Doors ajanga alima nung Kristianpur alitsü linük tamajungtiba asadangba 2024 World Watch List nung India ya jenjang 11 buba nung lir. 2013 küm India ya jenjang 31 buba nung liasü, saka Ato Kilonser Narendra Modi yimsüsüba aru tamajungba akum.

Hindu nationalist Bharatiya Janata Party (BJP) lenisüba kübok National Democratic Alliance sorkari Hindu masüba nisungtem senzüka yutsüba mechii linük tesem balala nung Hindu extremists temi Kristianpur dak timtem agütsütsü temulung uludaktsür, ta tamangba yimsü temeden asoshi nokdakba advocates temi ashir.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Takiang

(v) telok nem súngó agüjang ta ashiba (ask to serve tea to a group)
 * Tanishiri lokti senden nung lanurtem dang súngó takiang ta ashi.

Taklemtsü

(n) temetaktsü aketba súngó tu (nettle)
 * Yim tezülen taklemtsü kanga longsua mey

OLONG PAITEP # 6854

1	2	3	4	5			
		6					7
8							
9		10		11			
		12			13		
				14			
16			17				

TIPLÉN

1. Nisung jenti
4. Tsük rudenba
6. Temzung tesashi
8. S ___ i
9. Nisung telemsa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Sungdong tatembangtiba
17. Meputep

LANGTSÜNGLEN

- | | | |
|-------|--------------------------------|-------|
| - (5) | 1. Tenük telong | - (9) |
| - (5) | 2. Committee dang ajar | - (5) |
| - (5) | 3. Yagi ki okdoker | - (7) |
| - (3) | 5. Yim lenmang | - (5) |
| - (4) | 7. Temoatsü keter meyipa aruba | - (9) |
| - (4) | 11. Kanga junga menemba | - (7) |
| - (3) | 12. Majinü | - (5) |
| - (5) | 13. Tzüma nung senzüba | - (5) |

OLONG PAITEP # 6853 TELANGZÜBA**TIPLÉN :**

2. Bangsemo, 6. Tiptem, 8. Jen,
9. Talila, 11. Aren, 12. Tzübo, 14. Alia,
16. Angati, 17. Odi, 18. Azü,
19. Sunglang.


LANGTSÜNGLEN :

1. Yipten, 3. Nuja, 4. Sangro,
5. Milen, 7. Tulu, 10. Laza,
11. Aben, 12. Tiyong, 13. Ajizük,
14. Aitsü, 15. Tasa, 16. Aina.

NAI-A YA METETTER MA

China kubok Guangdong Province nung July 21, 2024 nü Shenzhen-Zhongshan Link lapokogo. Kilometer 24 lenmang ya Shenzhen airport nungi tenzüker aser Pearl River nung Ma'anshan Island, Zhongshan den sendakteper. Iba megaproject nung underwater tunnel ka, bridge ana aser artificial islands ana dena lir.

Iba apu ajanga Zhongshan aser Shenzhen tsüngda senzüsenbongba ghonda ana ser minute 30 ajemtsür. Iba lenmang nung Shenzhen-Zhongshan Bridge (1,666 meters) lir aser iba ya alima nung largest span, highest bridge deck (91 metres) aser highest navigation clearance for a sea bridge lir.

Assam súngolu nung inyakertem asoshi Rs 1000 crore lemzüksü

Iba scheme tasen ajanga Assam nung súngolu nung inyakertem yaritsü maongka aika angutsü ta pai ashi.

CM Sarma-i Centre sorkar aser Prime Minister Narendra Modi dang pelaba metedaktsü.

"Prime Minister Narendra Modi-i aniba sorkar dang iba scheme balaka tenzüksüba asoshi kanga pelar aser iba ajanga Assam súngolu industry tongtiret adianutemajangzüksü" ta pai ashi.

Pradhan Mantri Cha Shramik Protsahan Yojana ajanga Assam nung súngolu nung mapa inyakertem ajungkettsü nükjidong lir. Iba ajanga tea industry nung inyaker nisung meyirjang aika taküm nung kongshitsü imlar.

Guwahati, July 23, 2024

Pradhan Mantri Cha Shramik (Agencies): Centre sorkari Protsahan Yojana inyaktsü Assam nung súngolu nung atema Rs 1000 crore lemzüksüba asoshi pelar ta Assam chief minister Himanta Biswa Sarma-i ashi.

Union budget 2024 nung

Pradhan Mantri Cha Shramik Protsahan Yojana inyaktsü Assam nung súngolu nung mapa inyakertem ajungkettsü nükjidong lir. Iba ajanga tea industry nung inyaker nisung meyirjang aika taküm nung kongshitsü imlar.

Rongsenketzüng tsütsü tayongzükba balala den ano tawa par constituency nung tzümetüsü timtem ajuruba atema sorkari teinyaktsü tim meinyaker ta paisa ashi.

Coalition sorkari pa mezungoker aser administrative committee chairman shimba nunga pa medendaktsü aser iba nisung ya drug ken o ka nung sendaktepa lir ta Hassan-isa ashi.

"Ketdangsürtemi mapa shitak meinyakra onoki tuluba lungkak aittsü" ta paisa metedaktsüogo.

Imphal, July 23, 2024

(Agencies): Manipur nung Kshetrigao MLA Sheikh Noorul Hassan-i anir par constituency nung mpanga talangka Public Distribution System (PDS) jang magütsüba atema timi lungkak atiba sentong ka agiogo.

Top Khongnangmakhong nung Hassan'er kidang nungi iba sentong tenzük aser Imphal East nung DC Complex tashi ao.

District Commissioner (DC) tang mapa kar nung mazüng aliba agi Hassan aser pa pusemortem Imphal East nung Additional District Magistrate (ADM) den ajurutep.

Iba senden nung Hassan-i tesüba ita 8 tashi PDS jang mangubua khuret lemsatep.

Ketdangsürtemi ita ana indang jang agütsütsü ashiba pai magizük aser anogo ana asem tsüngda jang magütsüi aliba ajak agütsütsü takhangba agütsü.

"Department of CAF and PD-i yaküm November nungi tatemtsü balala amshia jang magütsüi aruba aitsür. Iba onük ya taoba nung Chief Minister den lemsatepogo aser pai ita ana tsüngda agütsütsü nangzük. Tawa DC indang agents ajanga fair price shop tasen 23 lapokogo saka tang atshi jang

Arunachal hydel projects ajanga kümshia Rs 10,000 crore aazüksü**Itanagar, July 23, 2024**

(Agencies): Arunachal Pradesh hydroelectric sector ajanga kümshia Rs 10,000 crore aazüksü ta Deputy Chief Minister aser Power Minister Chowna Mein-i ashi.

Hydel projects 13 mapa renemba sülen Rs 10,000 crore shi aazüksü ta paisa ashi.

Arunachal Pradesh nung

hydroelectric power maparen nung tayongzükba aika ajurur aser iba nung ketdangsürtemi timtem agütsüba den nübor temi anema noktakba dena lir. Item ya liaka Power Department aser central power sector

undertakings pusema nungittsu ta Mein-i ashi.

Paisa 2000 MW Subansiri Lower aser 2800 MW Dibang

Multipurpose Project nung temulung agütsütsü nenshia ashi.

Arunachal Pradesh nung tesem aika nung mapang shia power cuts alir aser iba ya koktettsü atema transmission lines tasen tang teyangludak lir. 2025 tashi nung item maparen tebangtsü aser load-shedding khuret koktettsü ta Deputy Chief Minister Mein-isa ashi.

**GOVERNMENT OF NAGALAND
DIRECTORATE OF HEALTH & FAMILY WELFARE
NAGALAND: KOHIMA****No.DHFW-5/D.Pharm/Part-II/2014/7229-33****Dated, Kohima the 19th July'2024****NOTIFICATION**

With reference to the Letter No.F.11?2-RIPSAT/2021(E-office)/3167-79>Date: Agartala, the 21st June, 2024, the following Candidates are selected on 19rd July'2024 to undergo Diploma in Pharmacy (D.Pharm) course at RIPSAT, Agartala for the Academic session 2024-2025. The following Candidates are provisionally selected through Academic Merit Marks.

Acceptance Letter may be submitted to the Office within 5 days from the date of issue of the Notification. Waiting List will be maintained for a period of 3 (Three) months w.e.f the date of issue of this result.

Selected List

1. VivithsüPoji
2. N Lungjai
3. MoilüngPhom
4. BenileKez
5. LeyingzaMurry

Waiting List

1. Akiho K Sheqi
2. Sakunungla
3. RenemlaTungoe

SD/-DR.E. MOTSUTHUNG PATTON**Principal Director****Directorate of Health & Family Welfare,
Nagaland: Kohima.**

**GOVERNMENT OF NAGALAND
HOME DEPARTMENT
GENERAL ADMINISTRATION BRANCH - I
ADVERTISEMENT**

The Office of the Chief Secretary, Government of Nagaland, is seeking applications from eligible candidates to fill two vacant positions of Young Professionals in the Chief Secretary's Program Management Unit on temporary engagement basis.

The detailed advertisement that includes the application form, details on the scope of work, remuneration, terms of engagement etc can be downloaded at <https://chiefsecretary.nagaland.Nov.in/> or <https://nagaland.Nov.in/news-updates>.

Interested candidates who meet the requirements may submit their application along with duly self-attested copies of all relevant documents to the Office of the Chief Secretary, Nagaland Civil Secretariat, Kohima-797001, Nagaland by registered post or by hand latest by 4:00 PM of 30th July 2024.

**Home Commissioner,
Nagaland, Kohima.**

**GOVERNMENT OF NAGALAND
DIRECTORATE OF TECHNICAL EDUCATION
NAGALAND, KOHIMA**

NOTIFICATION

NO. DTE/ ESTT-2/7/2019-20/ This is to notify all the candidates who have applied for State Reserved Seats in under-graduate Engineering degree courses in (i) Agricultural Engineering (ii) Biotechnology (iii) Computer Science & Engineering (vi) Information Technology (v) Electronics & Communication Engineering (vi) Civil Engg. (vii) Mechanical Engg. & (viii) Food Technology at various Engineering colleges for 2024-25 academic session, that the provisional list of selected candidates have been uploaded in the Department website: www.dte.nagaland.gov.in.

Selected candidates are informed to submit their Acceptance Letter to the office of the under-signed on or before 30th July, 2024 during office hours. Non submission of acceptance letter will be considered as declined.

(Er. VIPULHOU LHOUNGU)
Director

China-i Palestine nunger telok ana lungjemdaktsütsü meranger

Beijing, Chiteni/July 23 Authority yagi West Bank samatsütsü nangzüka aliba shilem kar nung yimsü súa aru. Israel-i Beijing declaration ya October 7 nü Hamas-i magizük.

Israel amakdang nisung 1,200 shi tepster 251 pua bener Gaza-i aoba ajanga Gaza nung Israel den rara tenzüker Hamas-i iba tesem amokbanga aliba samaogo. Israel-i amakba ajanga Gaza nung Palestine nunger nisung 39,000 dak tema tepsetogo, ta iba territory nung Hamas meyong health ministry ajanga ashir.

Hamas odongtar Hossam Badran-i Telegram nung sangdong ka post sütsüba nung, iba sangdong ya Palestinian national unity ngutettsü lenmang nung mera tajung ka lir, ta ashi.

Rara atemtsü dak sendakba nung Palestine nungeri akangba, kong ceasefire, Gaza Strip nungi (Israel sepai) ajak ainshitsü, teyari aser tanaben yanglubishi, nung telok balalai mulungteper, ta pai ashi.

Tongtipangtiba shilem ka nung mulungtepbaji Gaza aser West Bank nung asen nübur ketdangsütsü atema Palestinian national consensus government ka kumtetsüba ya lir, shirnoki reconstruction ketdangsütsü aser elections asoshi renemtsü, ta ashi.

Gaza nungi tashiyim amshia Fatah aridoker Hamas kisüngi 2007 nungi yimsü asü tenzüker telemsa tulu adoka liasü. 2006 national elections nung Hamas-i takok ngur parnoki aniba unity government ka Palestine tir aser Fatah lenir Mahmoud Abbas-i anentsüba sülen iba ya atalok.

Iba sülenbo Fatah-i amokbanga aliba Palestinian

"Kiralongraba magizüktü melen Mahmoud Abbas-i nisung tepster aser tashiyim amshia tetsür dak shi nung medemer Hamas dak azüita pa indang tejak chichiba sayur," ta Israel indang Foreign Minister Israel Katz-i social media X nung ashi.

"Asangsang nung ibai mataloktsü, kechiaser Hamas yimsüsüba samatsütsü aser Abbas-i meta talang nungi Gaza repranga alitsü. Israel indang security ya Israel nunger kabu nung dang alitsü."

Ajisüaka taoba mapang takok manguba ajanga China temulung ajema makum, shirnoki Israel-Hamas rara nung tetsüngtai ia yimjung bener arutsüner aser Palestine nunger lungjemdaktsüner. Beijing yagi taoba mapanga April ita Hamas asr Fatah tsüngta jembishinü ayongzüka liasü.

"China aser Palestine ya tamang katetba adianu aser partners tajung lir. Telungjem aser akangjungshi atema China-i nüngdakba telok den anibelem mesasai inyaktsü," ta foreign ministry odongtar Mao Ning-i Mongulbarnü ashi.

"Akangjungshiteptsü ya Palestine nunger telok balala tsüngta inyaktsüba maparen lir, saka kasa mapang linük balalai meyarira takok mangutsü," ta foreign minister Wang Yi-ia ashi.

Rara matemdang Hamas

Ethiopia alinen nungi nisung tasümang 157 agitetogo

Addis Ababa, Chiteni/July 23 (Agencies): Ethiopia linük south tsütsü alinen ana aluba nung asüba nisung tasümang 157 agiteta lir, ta yangji aliba ketdangsür temi ashi.

Gofa zone tezülen tenem tekong alidak tzünglu kanga sashia aruba sülen alinen ya Deobar nikongdang aser Hombar anepdang alua liasü.

Iba lendong nung takum jenbuja alirtem bushiba manener saka asürtem tali akumtsü akok, ta ketdangsür temi ashir.

Video prokhiba nunga nisung noklang aika iba tesem nung adenshia liasü aser kar ali tua telung nung nembunga aliba nisungtem bushitepa liasü.

Goza zone indang chief administrator Dagemawi Ayele-i osangbener dang ashiba agi, asürtem rongnung tanur-tain ajak lir aser nisung ter takum kumzükba mozüki nung temang anepalutar.

Tzünglu kanga sashia aruba ajanga Deobarnü alinen ka alu aser police officers, tesayur aser anasa aliba yimtsüngtem nungi nüburtem Hombarnü adenshia iba timtem ajurua aliba nisungtem bushitepa mapang alinen tanabuba anena

parnok anenbang, ta Dagemawi ashi.

"Onoki tang tashi ali aoner," ta pai ashi.

Gofa ya Southern Ethiopia state nung shilem ka lir aser linük yimtiba Addis Ababa nungi south-west tsütsü kilometre 320 (mile 199) shi pilar lir.

Tawa tzünglu tesashi arua tzümetüng adokba mapang iba linük nung kanga sashia kongshiba tesemtem rongnung Southern Ethiopia dena lir, ta UN indang Office for the Coordination of Humanitarian Affairs (OCHA) ajanga ashir.

Ajisüaka alinen aser tzümetüng lendong ya tang tasen masü. 2016 küm May ita linük south tsütsü tzünglu kanga sashia arur alinen aser tzümetüng adokba nung nisung 50 shi asü.

Tensa balala ajanga tzümetüng adokdaksür, saka tzü-mopung melenshiba ajanga atmosphere talemba kuma tzünglu sashia arudaksür.

Alima ya industrial putu tenzüker 1.2C agi talemba kumogo, aser alima nung mokozü tamajung azüoktsü asoshi sorkari mera magi tashi temperature talemba akumtsü.

Myanmar military tekolakba acting president kümogo

Yangon, Chiteni/July 23 (Agencies): Myanmar nung tang teinyakdak tir, Myint Swe medical leave agiogo aser pa mapa military tekolakba Min Aung Hlaing nem belenzüktsüogo, ta army-i sangdong ka ajanga meedaktsü.

Tir mapa bona atatsü atema MinAung Hlaing shimba indang osang ya state meyong MRTV television-i metedaktsü aser ashiba agi, Hlaing nem Hombarnü acting tir indang office nungi shiti ka agütsüogo.

Iba shiti ajanga Myint Swe medical leave agir aliba mapang National Defence aser Security Council

Council dak sendakba ken o balala achaayangtsü atema acting tir ama jenjang agitsü asoshi Min Aung Hlaing nem tashi agütsüogo.

"Acting tir mapa State Administration Council mendenbuba nem belenzüktsüogo," ta military sorkari parnoki amshiba nüngja iba osang metedakaja liasü.

Linük nung state of emergency benoka aliba benokshitsü atema inyakyim mebenok tsüngda hopta ka jelja iba osang ya sangdongogo.

2021 küm February ita Aung San Suu Kyi aniba sorkar atsüngtoka military sorkar ka amenokba sülen military-i mezüng state of emergency benokshitsü atema tashi lir.

Military-i ashiba agi, parnok yimsüsüba anema prangbong hadir balala bener nokdakba telungpur teloktemi linük mesüngjemtetti kümdaktsür aliba azüoktsü atema state of emergency ya benoktsü nüngdaker. Item teloktem yagi army den linük kübok tesem balala nung rara arudar.

(Maneni tapak 8 nung...)

8buba SAKC nung Akumienla-i bronze medal angu



Tabelen nungi tachichi :

1. Renshi Soibam Bindeshori Chanu, Technical Secretary of ISKF-INDIA as Female Official.
2. Ms. Akumienla Limanungsang Imchen
3. Kyoshi Mutum Bankim : Chief of International Shito Ryu Karate Federation, India

Dimapur, Chiteni/July 23 asayamung ya Royal Institute of (TYO): Longjang yimtsüng Management, Thimphu nung nungi Akumienla Limanungsang July 13 nungi 20 tashi asaya Imchen-i official International liasü.

La India tenüng nungi asayatsü atema National Federation of Karate-i shima liasü. Sensei Temsu Sangtam lenisüba nung Logdrum Higher Secondary School Dojo, Sangtamilla, Dimapur kubok All Nagaland Karate Do Association nung la Senior Karate ka lir. Temsu Sangtam ya iba dojo indang Chief Instructor lir.

La ya Nagaland nungi India tenüng nungi asaya-a medal anguba mezüngbuba asayar lir. Lai 8buba South Asian Karate Championship 2024, Senior Female Kumite nung bronze medal ka ngua liasü. Iba Akumienla ya Landmark

Colony, Dimapur nung alir Limanungsang Imchen aser Achala Tzuder na jala lir.

Lai tang mezüngbuba Official International Championship ka nung shilem agiogo aser la meina Chief of International Shito Ryu Karate Federation, India Kyoshi Mutum Bankim Singh aser Renshi Soibam Bindeshori Chanu, ISKF-INDIA Technical Secretary nati meiner oa liasü.

Iba asayamung ya South Asian Karate Federation-i ayongzük aser Bhutan Olympic Committee-i teyari agüja Bhutan Karate Association-i achaayanga asaya liasü.

All Nagaland Karate Do Association tir Kyoshi T.Sangtam, Working President Sensei Lanu Imchen, Technical Director Shihan Thsathribha Sangtam, Sensei Rongsen Vice President han Dr. Senliwati Logkumer, Sensei Kasheto aser ketedangsürtem aser asayartem ajaki, official International Karate Championship nung tang mezüngbuba Nagaland Karate puti otsü nung medal ka anguba atema Akumienla nem tenüngsang agütsüba den kanga pelaba lemsatepogo.

La tang IRB 15th NAP Mahila Battalion nung Rifle Women ka lir. Association-isa, Nagaland DGP Robin Sharma aser 15th IR Commandant dang, la nongita yariba aser Karate Championship ajak nung shilem agitsü atema temelaba agütsüba atema kanga pelaba lemsatepogo.

ataema jenjang agidat, koba parnoki United States aser Canada na den longjemer ayongzüka asayatsü.

Arishi küm 65 tain Aguirre ya taoba mapang Mexico coach liasü aser pa lenisüba nung linük team 2002 aser 2010 küm World Cup asayaogo aser anabenprongla parnok tanabuba round tonga asaya liasü.

Pa taoba mapang Japan aser Egypt indang national team coach liasü aser iba den Spain nung Atletico Madrid, Espanyol, aser Real Mallorca coach mapa dena benogo.

Taoba hopta Mexican federation-i ashiba agi, parnoki Lozano nem 2030 tashi inyaktsü atema contract ka agütsü, kong pa 2024 nungi 2026 küm tashi coach tejen ka kubok inyaktsüba indang onük ka densema liasü.

Tenangzüktepba yanglutet asübo Lozano 2026 nungi 2030 tsüngda mapang ka nungbo ano head coach kümla. Ajisüaka federation-i ashiba agi, Lozano-i parnoki benokba onük magizük aser mapa toktsütsü telemtetba agiogo.

Javier Aguirre Mexico football team coach kümogo



Chiteni/July 23, 2024 inyaka atatsü benokba pai (Agencies): Mexico nunger magizükba sülen pa mapa nungi coach tejen Javier Aguirre, tanaben national football team asütsü shimogo. 2026

"National team technical director asütsü Javier 'El Vasco' Aguirre shimba pelashchia sangdonder," ta federation ketedangsür Duilio Davino-i social media ajanga metedaktsü.

Taoba mapang nüngtugu asayar Rafael Marquez, Aguirre indang assistant asütsü. 2026 World Cup nung Mexico team-i tajungba asayatetsü

Aguirre-i, Jaime Lozano melenogo, shiba taoba hopta mapa nungi anenja liasü. Football federation-i taruba international asayamuntem nung Lozano shilem ajemshir

Union Budget nung Khelo India atema sen crore 900 lemzüksü

Chiteni/July 23, 2024 yanglushir sen crore 880 kümstsü.

2018 küm mezüngbuba Khelo India Youth Games (KIYG) asayaba sülen sorkari sentong talila bendenloka arudar.

Ministry-i 2020 küm Khelo India University Games bendenlok aser iba sülen kasa küm Khelo India Winter Games aser 2023 küm Khelo India Para Games bendenloka liasü.

Sempet tajung aketba asayartem nem facility balala agütsütsü atema linük kubok tesem balala nung Khelo India State Centres of Excellence (KISCE) noklang aika amenokogo. Khelo India asayartem aika tang India Olympic team nung züngoksema lir.

National Sports Federations (NSFs) nem sorkari teyari agütsüba-a 2023-24 küm crore 325 aliba crore 15 bendenloka crore 340 kümstsügo.

Kasa mapang nung Sports Authority of India indang budget crore 795.77 aliba crore 26.83 bendenloka tang crore 822.60 jungogo.

National Anti-Doping Agency (NADA) aser National Dope Testing Laboratory na nema crore 22.30 aser crore 22 lemzüksügo.

2021-i military-i sorkar atsüngda tir Win Myint aser Suu Kyi naprongla apuba sülen Myint Swe ya acting tir aküm, aser iba ajanga temulung melemtip adoka liasü.

Pro-military party züngsem Myint Swe-i tir mapa agizük, kechiyong pai first vice president mapa bener liasü. Iba jenjang agiba ajanga council adenshia state of emergency benoktsü aser tashi Min Aung Hlaing nem agütsütsü atema temzung ozüng dak sendakba nung mongintem aikati ashihiogo.

Min Aung Hlaing ya military council aser military-i amenoktsüba sorkar indang mendenbuba lir. Sorkar atsüngba sülen ita trok lir pai pasasa pa Ato Kilonser akumba sangdonga liasü.

Sorkari ashiba agi, parnoki 2025 küm election ayongzük agitsü. Ajisüaka ken o asadangertem ashiba agi iba election ya sadem sadema aser ochishia agitsübo mimlar.

BILEMDANGANG
"Meranga inyakdanger ajaki sakloker."